

SCRIPT OF EVENING GOJRI NEWS BULLETIN 22JAN 2026

1700HRS

ایوننگ گوجری نیوز بولین 22 جنوری 2026

یوہ آکاشوانی جموں ہے محمد اشفاق تے نصرت چودھری تیں خبر سنو۔

HEADLINES

- ۱۔ وزیر اعلیٰ عمر عبداللہ غی زیر صدارت کابینہ میٹنگ بجٹ اجلاس تیں پہلاں جموں مانہ منعقد ہوئی۔
- ۲۔ مرکزی وزیر ڈاکٹر جتندر سنگھ نے فضائی فورس ادھمپور پُج غے ادھمپور تیں سیول ہوائی پرواز بارے معائنو کیو۔
- ۳۔ بہدرواہ علاقہ مانہ فوج غی گڈی گہری کھائی مانہ پین غی وجہ سنگ 10 فوجی جوان جواں بحق ہو گیا ہیں۔
- ۴۔ چیف سیکرٹری نے سڑک حادثات مانہ کمی واسطے جی۔آئی۔ایس تے ڈیٹا ور مبنی اقدامات اپنان غی ہدایت کی۔
- ۵۔ جموں کشمیر مانہ دو مغربی ہوائی سلسلہ تیں بارش تے برف باری غا امکان ہیں جس غے باعث 24 جنوری توڑی تے پھر 26 تیں 28 جنوری غے دوران ہوائی تے زمینی سفر متاثر ہوسکے۔

CM CABINET MEET

وزیر اعلیٰ عمر عبداللہ نے اج جموں غا سیول سیکرٹریٹ مانہ کابینہ میٹنگ غی صدارت کی۔ یہ میٹنگ جموں کشمیر قانون ساز اسمبلی غا آئندہ بجٹ اجلاس تیں پہلاں بلانی گئی، جہڑو 2 فروری تیں شروع ہون آلو ہے۔ میٹنگ مانہ عوامی تے انتظامی اہمیت غا مسائل ور غور کیو گیو۔ آکاشوانی جموں گا نمائندہ غے مطابق، اس میٹنگ مانہ نائب وزیر اعلیٰ، دیگر کابینہ غا وزراء تے چیف سیکرٹری وی موجود تھامیٹنگ غے دوران مرکزی زیر انتظام علاقہ تیں متعلق کئی اہم امور ور گل بات ہوئی، جن مانہ انتظامی معاملات، ترقی تے عوامی فلاح ور خاص توجہ دتی گئی۔ کابینہ نے جاری انتظامی معاملات غو جائیزولیو تے عوامی خدمات نانہ بہتر بنان واسطے مسائل ور غور کیو۔

JITENDRA AIR FLIGHT

مرکزی وزیر ڈاکٹر جتندر سنگھ نے فضائی فورس سٹیشن ادھمپور پُج غے ادھمپور تیں سیول ہوائی پرواز بارے معائنو کیو اس موقع ور مرکز غی فضائیہ بارے ایک اعلیٰ سطحی ٹیم غے فضائیہ بارے مرکزی سیکرٹری سمیر سنہا تے بھارتی ایروپوٹ اتھارٹی غا چنیر مین وین کمار وی شامل تھا اس دوران یو ٹی گا تمام بڑا افسران رکن اسمبلی پون گپتا بی ایس منکوٹیا ڈیو کم رمیش کمار ڈی سی ادھمپور سلونی رائے تے دیگر افسر وی اُت موجود تھا اس بارے بولتا واں ڈاکٹر جتندر سنگھ نے اس طرح کہیو۔

BHADERWAH ACCIDENT

اج بھدرواہ گا کھنی ٹاپ گا مقام ور فوج غی ایک گڈی سڑک حادثہ غو شکار ہوئی جس گا نتیجہ مانہ 10 فوجی جوانان غی موت واقعہ ہوئی ہے تے دوجا 10 افراد زخمی ہوا ہیں سرکاری ذریعہ غے مطابق یوہ حادثہ اس وقت پیش آیو جد فوج غی ایک گڈی سڑک توں تلک غے پلٹ گئی اس بچاؤ کاروائی مانہ زخمیاں نانہ بھدرواہ اسپتال پرتھی کیو گئیو تے شدید زخمی فوجی جوانان نانہ ہوائی پرواز غے ذریعے فوجی اسپتال ادھمپور پُجایو گئیو تانجے خصوصی دیکھ بال مانہ اُن غی جان بچائی جاسکے۔

BIKE RALLY

قومی سڑک حفاظت مہینہ 2026 غا موقع ور ، ڈوڈہ مانہ پیراڈائیز ٹی۔وی۔ایس نے موٹر وہیکل محکمہ ڈوڈہ غا اشتراک تیں ایک آگاہی ہائیک ریلی غو انعقاد کیو۔اس ریلی غو مقصد سڑکاں غی حفاظت نانہ فروغ دینو تے حادثات مانہ کمی لیانو تھو۔ریلی مانہ محفوظ سواری ، ہیلٹ غو استعمال تے ذمہ دار ڈرائونگ ور زور دتو گئیو۔ یہ ریلی سڑک حفاظت، زندگی حفاظت ، غا عنوان غے تحت کڈی گئی۔ ڈپٹی کمشنر ڈوڈہ برویندر سنگھ نے ریلی نانہ چھنڈی دس غے روانہ کیو۔ریلی شہر غا اہم علاقان تیں گزری، جت لوکاں نانہ ٹریفک قوانین تے محفوظ ڈرائونگ غا بارا مانہ آگاہ کیو گئیو۔ریلی مانہ شامل ہائیک سواران نے سفر غے دوران ہیلٹ لان غی اہمیت نانہ اُجاگر کیو۔ریلی مانہ شریک ایک ہائیک سوار نے اس طرح کہیو۔

PROG ANN

علاقائی خبران آلو شعبو آکاشوانی جموں 23 جنوری 2026 نانہ قومی یوم شجاعت غا موقع ور 25 منٹان گو ایک خصوصی گل بات گو پروگرام منعقد کرے غو اس خصوصی نشریات غو موضوع شجاعت تیں ترغیب، نیتاجی غا خیالات تے اج غو بھارت، رکھیو گئیو ہے۔ تے یاہ نشریات 23 جنوری نانہ تہاڑی غا 12 بجے براہ راست سنی جاسکے جس مانہ ماری مہمان ویں غی پروفیسر ششی پرپھا جھپڑی پروگرام غا موضوع ور اپنی رائے رکھیں غی۔پروگرام غی میزبانی کریں گا مارا انگر وجے بجاج۔

CS GIS

چیف سیکرٹری اٹل ڈلو نے اج سپریم کورٹ غی ہدایت غے مطابق سڑکاں غی حفاظت غا اقدامات غو جائیزو لیو۔اُنہاں نے کہیو کہ جی۔آئی۔ایس ور مبنی ڈیٹا غو زیادہ استعمال ضروری ہے تانجے مختلف ضلاع مانہ خطرناک تے حادثات آلی سڑکاں غی نشاندہی کی جاسکے۔اُنہاں نے زور دیتا وں کہیو کہ ڈیٹا غی بُنیاد ور کی گئی یہ نشاندہی، جدید تکنیک تے زمینی اقدامات غے ذریعے سڑک حادثات نانہ کھٹ کرن مانہ مدد دے غی۔اس میٹنگ مانہ متعلقہ محکماں گا انتظامی سیکریٹریز، ٹریفک پولیس غا اعلیٰ افسر تے محکماں غا سربراہان شریک ہوا، جد کہ ضلع ترقیاتی کمشنراں نے ویڈیو کانفرنس غے ذریعے اس میٹنگ مانہ شرکت کی۔چیف سیکرٹری نے سڑکاں غی حفاظت تیں متعلق سپریم کورٹ غی ہدایات ور تفصیلی رپوٹ وی طلب کی۔

SECURITY ARRANGEMENTS

عام عوام غی حفاظت نانہہ یقینی بنان خاطر ضلع ریاسی بشمول قصبہ ریاسی کٹڑا تے قومی شاہراہ 144 غے کول کال حفاظتی معاملات بدھا دتا گیا ہیں واضع رہ جے بہتر حفاظتی اقدامات گا حصہ غا طور ور حساس مقامات ور اضافی حفاظتی دستاں نانہہ تعینات کیو گیو ہے تے بکھ بکھ معاملات ور نگرانی واسطے چیک پوسٹ قائم کی گئیں ہیں یاد رہ جے مسافراں تے زائرین گا زیادہ نقل و حمل آلا علاقہ کٹڑا تے دوجا دیگر علاقان مانہہ حفاظتی معاملات غے پیش نظر خاص توجہ دتی گئی ہے تانجے امن و امان نانہہ برقرار رکھیو جاسکے تے کسے وی ناخشگوار واقع نانہہ روکیو جاسکے۔

SECURITY NHW

واں یوم جمہوریہ گی تقریبیاں توں پہلاں ضلع رام بن تے جموں سرینگر قومی 77 شاہراہ ور متی تعداد مانہہ سی۔آر۔پی۔ایف گا جوان نانہہ تعینات کیو گیو ہے تانجے حفاظتی معاملات نانہہ یقینی بنایو جاسکے تے اس سلسلہ مانہہ علاقہ مانہہ امن و امن برقرار رکھن خاطر قومی شاہراہ گشت تے تلاشی کاروائی نانہہ تیز کردتو گیو ہے یاد رہ جے یوم جمہوریہ غے دوران کسے ملک مخالف سرگرمیاں نانہہ روکن واسطے یاہ کاروائی کی جارئی ہے اس سلسلہ مانہہ بہتر حفاظتی اقدامات گا حصہ غا طور ور کیوک ایکشن ٹیم تے روڈ اوپننگ پارٹیز سنگ اضافی نگران ٹیم تعینات کی گئی ہیں۔

VANDE MATRAM

قومی گیت وندے ماترم مہم گا دوجہ مرحلہ غے تحت ضلع انتظامیہ کٹھوعہ نے ضلع پھر مانہہ خصوصی تقریبیاں گو انعقاد کیو اس گو مقصد عوام اندر حب الوطنی قومی اتحاد تے عوام مانہہ آئی اقدار نانہہ آجاگر کرنو ہے اس موقع ور خطہ غو سپورٹس سٹیڈیم اندر ایک عظیم شان تقریب گو انعقاد کیو گیو جس مانہہ طلباء ، نوجوان ، سرکاری ملازمین ، حفاظتی دستاں سمیت دیگر سماجی کارکناں نے شرکت کی جت لوکاں اندر وطن سنگ محبت گا جذبہ نانہہ دیکھیو گیو اس سلسلہ مانہہ ضلع ترقیاتی کمشنر راجیش شرما نے صحافیاں سنگ گل کرتا واں اس طرح کہیو۔

WEATHER

مرکزی زیر انتظام علاقہ مانہہ گزشتہ روز، موسم غے پیش نظر تبدیلی، نظر آئی۔وادی کشمیر غا کئی علاقان مانہہ رات غے وقت درجہ حرارت مانہہ کمی دیکھی گئی۔محکمہ موسمیات غے مطابق اج تیں جموں کشمیر مانہہ بارش تے برف باری گا امکان ہیں۔ محکمہ نے ہدایت جاری کرتا واں خبر دار کیو ہے کہ دو مغربی ہوائی سلسلہ مسلسل طور ور خطہ نانہہ متاثر کریں گا۔پہلو سلسلہ اوج تیں 24 جنوری توڑی تے دوجو 26 جنوری غی رات تیں 28 جنوری غی سویر توڑی جاری رے غو۔پیش ہے اس بارا مانہہ یاہ رپوٹ۔

HORTICULTURE DEPT RBN

بوٹا لان بارے باغبانی سکیم ایسو پروگرام ہے جس غے تحت کساناں نانہ مالی مدد تے رعایت دتی جارئی ہے۔ تانجے وہ پھل، سبزیاں، مصالحہ جات تے پھول اُگا سکیں۔ ان سکیمیاں مانہ پودا لان غو سامان، ڈرپ آبپاشی، آلات تے ہائی ڈنسٹی کھیتی غا اخراجات شامل ہیں۔ مشن باغبانی غی ہمہ گیر ترقی، تے قومی باغبانی بورڈ، پوداں غی تیاری، آبپاشی، نرسری تے ان سکیمیاں غے تحت قرض تیں منسلک رعایت دتی جے۔ اچھا معیار غا پودا، بیچاں ور بعض وقت 75 فی صد غی رعایت دتی جے۔ پردھان منتری کرشی سنچائی یوجنا غے تحت محکمہ نکی آبپاشی ور خاص توجہ دے رئی ہے، جس سنگ چھوٹا تے معمولی کساناں نانہ 100 فی صد رعایت دتی جارئی ہے۔ اس بارے مانہ مزید معلومات دیتا واں، چیف ہارٹی کلچر آفیسر رامبن، راجندر کمار نے اس طرح کہیو۔
